

Newspaper	UTUSAN MALAYSIA
Date	14 JAN 2015

PM hargai bantuan China

um-14/1/2015

KUALA LUMPUR 13 Jan. - Datuk Seri Najib Tun Razak merakamkan penghargaan atas keprihatinan kerajaan China dalam menyalurkan bantuan bagi membantu mangsa banjir di negara ini.

Menurut Perdana Menteri, bantuan sewaktu negara dilanda bencana itu menunjukkan China merupakan rakan yang sangat akrab dan prihatin untuk menghulurkan bantuan yang secara jelas diterima baik oleh rakyat Malaysia.

"Saya bagi pihak kerajaan dan rakyat Malaysia khususnya mangsa banjir mengucapkan setinggi-tinggi penghargaan kepada Kerajaan Republik Rakyat China khususnya Presiden Xi Jinping," katanya.

Beliau berkata demikian dalam majlis simbolik penyerahan sumbangan itu oleh Duta Besar China ke Malaysia, Dr. Huang Huikang di Wisma Perwira Angkatan Tentera Malaysia (ATM) di sini hari ini.

Yang turut hadir, Timbalan Perdana Menteri, Tan Sri Muhyiddin Yassin; Menteri Pertahanan, Datuk

Seri Hishammuddin Tun Hussein; Menteri Dalam Negeri, Datuk Seri Dr. Ahmad Zahid Hamidi; Ketua Setiausaha Negara, Tan Sri Dr. Ali Hamsa dan Setiausaha Majlis Keselamatan Negara (MKN), Datuk Mohamed Thajudeen Abdul Wahab.

Najib berkata, bantuan yang disalurkan China itu adalah 2,950 unit khemah, 220 set janakuasa, 40 pam air, 45 gulung hos air dan 60 mesin penyulingan air.

"Bantuan berkenaan akan tiba dalam tiga fasa, bantuan pertama sudah tiba dan sumbangan fasa kedua dan tiga akan tiba dalam sedikit masa.

"Di samping itu, kerajaan China telah membuat keputusan untuk membekalkan 400 rumah sementara yang akan didirikan dalam tempoh terdekat," kata beliau.

Mengulas kenyataan Persatuan Bulan Sabit Merah yang mendakwa tempoh pemulihan bencana banjir di negeri terlibat mengambil masa dua tahun, Najib menegaskan, proses pemulihan serta pembaikan

kawasan dilanda banjir tidak akan mengambil masa begitu lama.

"Kita tidak memerlukan tempoh dua tahun, malah saya telah mengarahkan mana-mana kawasan serta mangsa mempunyai tanah milik mereka, kita akan bantu mereka mendirikan rumah.

"Ini juga termasuk program khas seperti kawasan Gua Musang ada 1,000 rumah kos rendah telah siap dibina dan sedia untuk diduduki. Persoalannya sekarang adalah untuk menentukan senarai siapa yang layak untuk memiliki rumah tersebut," ujar beliau.

Dalam ada itu, Najib yang juga Menteri Kewangan berkata, buat masa ini, kerajaan masih dalam proses mengumpul maklumat bagi mengenal pasti kos sebenar yang diperlukan bagi tujuan pembaikan dan pemulihan di negeri-negeri yang dilanda banjir.

"Saya akan mengeluarkan kenyataan jumlah (mengenai kos sebenar pemulihan) itu minggu hadapan," katanya.